

MEMORIA XUSTIFICATIVA

O Consello Galego de Relacións Laborais, en xuntanza da Comisión Permanente de data 22 de xaneiro de 2024, e dentro do ámbito das súas funcións conforme á normativa reguladora, acordou a realización da *“VII edición do Curso de formación Universitaria de negociación colectiva e individual no ámbito laboral”*, que se desenvolverá desde o 17 de setembro ata o 21 de novembro do ano 2024, na Facultade de Ciencias Xurídicas e do Traballo de Vigo, co obxecto de afondar, analizar e estudar todas as cuestións relativas á negociación colectiva, capacitar ao alumnado para analizar en profundidade as condicións incluídas nos convenios colectivos e intervir eficazmente nos acordos. Trátase de fomentar a formación no eido da negociación laboral en toda a xeografía galega e, dadas as necesidades das persoas ás que está principalmente dirixido, achegar o curso a quen teña interese.

O alumnado estudará as técnicas e ferramentas clásicas e máis novas de negociación; adquirirán conciencia sobre a negociación colectiva e o diálogo social institucional en Galicia e no Estado español; aprenderán a negociar desde fórmulas que persigan resultados baseados na ganancia das dúas partes, a partir da análise dos intereses existentes máis que das posicións concretas; e repararán na oportunidade que supón a negociación colectiva como ferramenta para a consecución do principio de non discriminación e igualdade por razón de xénero no ámbito das relacións laborais.

Este curso vai dirixido ás persoas responsables da interlocución social, ás que teñen responsabilidade en recursos humanos, xefaturas de relacións laborais, asesorías e demais axentes implicados na negociación e na xestión laboral da empresa, co obxectivo principal de dar resposta á demanda social que existe no territorio galego, así como a estudantes que rematen os seus estudos de Grao e desexen recibir unha formación especializada e de nivel sobre a negociación colectiva e individual no ámbito laboral.

Con este propósito formativo, e fixándose en razóns de interese social e económico que permitan acadar acordos frutíferos para aumentar a produtividade do tecido empresarial galego, tense proposto pola Universidade de Vigo e o Consello Galego de Relacións Laborais este curso de formación en negociación colectiva e individual no ámbito das relacións laborais.

A Universidade de Vigo conta cun dos Grados de estudos universitarios máis antigos de Galicia referido ao estudo das relacións laborais e os recursos humanos, onde se imparte durante dous semestres unha extensa formación en materias de negociación colectiva e individual, ademais de materias complementarias e específicas sobre seguridade social, traballo autónomo, emprego público ou prevención de riscos, nas que tamén se aborda a perspectiva negociadora. Alén disto, na Universidade de Vigo impártese o Posgrado en Xestión e Dirección Laboral, coa especialidade de Dirección Laboral de empresas, que ven sendo ano tras ano un dos máis solicitados polos estudantes que tras os estudos de Grao buscan a especialización nesta materia por ser das que contan con máis demanda á hora de acceder ao mercado de traballo.

Dende a Área de Dereito do Traballo e da Seguridade Social da Universidade de Vigo, en tanto que se compón por especialistas no dereito colectivo, e, en concreto, no que respecta á

negociación colectiva, vense observando a necesidade de dar resposta a unha demanda dos interlocutores sociais e especialistas de Relacións Laborais e Recursos Humanos, como é un curso específico que aborde as técnicas de negociación. Tanto é así que se propuxo abordar tamén a negociación individual nos mesmos termos que se pretende que avance o Acordo Galego de Solución Extraxudicial de Conflitos. Tamén o contacto continuo que se ten cos axentes implicados na negociación –empresas, sindicatos, avogados especialistas, directores de recursos humanos...- ten posto de manifesto a necesidade de afondar no estudo e desenvolvemento destas importantes cuestións.

En orde á consecución do obxecto referido, é necesaria a subscripción dun convenio de colaboración entre o Consello Galego de Relacións Laborais e a Universidade de Vigo para resolver a concesión directa desta subvención, conforme ao disposto no artigo 19.4.a) da Lei 9/2007, do 13 de xuño, de subvencións de Galicia e no artigo 37 do seu Regulamento, aprobado por Decreto 11/2009, do 8 de xaneiro. O convenio axústase ao disposto no artigo 26. 2 da citada Lei de subvencións de Galicia e ten por obxecto establecer os compromisos aplicables e as condicións polas que se rexerá a colaboración entre as dúas entidades referidas para a realización do CURSO DE FORMACIÓN DE NEGOCIACIÓN COLECTIVA E INDIVIDUAL NO ÁMBITO LABORAL, que se desenvolverá desde o 17 de setembro ata o 21 de novembro do ano 2024.

O Consello Galego de Relacións Laborais contribuirá ao financiamento deste curso de formación mediante a achega de **DEZAOITO MIL EUROS (18.000,00€)**, con cargo ao capítulo IV do seu orzamento para o ano 2024, concretamente a aplicación orzamentaria 13.B1.324A.444.01, denominada “Subvención á Universidade de Vigo para curso de negociación laboral”., existindo crédito axeitado e suficiente segundo certificación expedida pola secretaria do organismo, que se xunta a este convenio como **Anexo II**.

Asemade, este organismo financiará con 30€ a matrícula de cada un dos 20 participantes propostos. A cantidade total (600,00€) abonaráselle á Universidade de Vigo unha vez rematado o prazo de matrícula, mediante transferencia desde a citada aplicación orzamentaria 13.B1.324A.444.01. O dito importe será computado á marxe da subvención regulada neste convenio para o funcionamento do curso. Este importe non cobre os prezos públicos por expedición de títulos, que será abonado por cada estudante matriculado.

Santiago de Compostela, na data da sinatura dixital

A secretaria do Consello Galego de Relacións Laborais

Cristina Fabeiro Varela